

七十二家集

牛奇章集引

玉山慙于北土牛里仁請  
開獻書之路遂乃逸函暴  
富東觀啓暉今取其表讀  
之尚有生氣則爾日之棟  
樑文囿豈待言也從來躡

錄都屬偏安隋氏苑五岳  
而池四海其禮敝更縫樂頽  
重緝者正惟里仁是賴使家  
識裳衣之盛人閑舞蹈之遺  
殆亦季世夔龍單門名碩  
史氏僅以方叔孫生過矣過

矣若夫緩步朗瞻夷外宏  
中居身在不夷不惠之間  
嚴交在不譎不瀆之外兄  
茲朝望脩是儒宗時主  
多猜重臣半成隙末而公  
恩禮始終尤悔雙遣詎偶

然哉公集三卷大率郊廟  
間條奏為多

張燮識

牛奇章集目錄

卷之一

樂府

郊廟歌辭

園丘歌八首

昭夏

皇夏

登歌

誠夏

文舞

需夏

武舞

昭夏

五郊歌五首

青帝歌角音

赤帝歌徵音

黃帝歌宮音

白帝歌商音

黑帝歌羽音

感帝歌

誠夏

雩祭歌

誠夏

蜡祭歌

誠夏

朝日夕月歌二首

朝日誠夏



夕月誠夏

方丘歌四首

昭夏

登歌

誠夏

昭夏

神州歌

誠夏

社稷歌四首

春祈社誠夏

春祈稷誠夏

秋報社誠夏

秋報稷誠夏

先農歌

誠夏

先聖先師歌

誠夏

太廟樂歌九首

迎神歌

登歌

俎入歌

皇高祖太原府君神室歌

皇曾祖康王神室歌

皇祖獻王神室歌

皇考太祖武元皇帝神室歌

飲福酒歌

送神歌

燕射歌辭

元會大饗歌十一首

皇夏

肆夏

食舉歌八曲

上壽歌

宴羣臣登歌

皇后房內歌

大射登歌

鼓吹曲辭

凱樂歌辭三首

述帝德

述諸軍用命

述天下太平

舞曲歌辭

文武舞歌二首

文舞歌

武舞歌

詩

奉賀冬至乾陽殿受朝應詔

煬帝冬至乾陽殿受朝附

卷之二

表

請開獻書表

奏

定樂奏

高帝答詔附

樂定奏

定典禮奏

論

六十律論

卷之三

議

明堂議

樂議

詳定樂議

又樂義

同律度量議

附錄

牛弘傳

唐魏徵

奏記牛尚書

隋王孝籍

傷牛尚書

隋劉斌

貴華



牛奇章集卷之一

隋安定牛弘里仁著

明閩漳張燮紹和纂

樂府

郊廟歌辭

園丘歌八首

昭夏

降神

肅祭典協良臣具嘉薦俟皇臻禮方成樂已變  
感靈心廻天睠闕華闕下乾宮乘精氣御祥風

望燿火通田燭膺介主受瑄玉神之臨慶陰陰  
煙衢洞宸路深善旣福德斯輔流鴻祚徧區宇

皇夏

皇帝  
升壇

於穆我后昭明有融道濟區域功格玄穹百神  
警衛萬國承風仁深德厚信洽義豐明發思政  
勤憂在躬鴻基惟永福祚長隆

### 登歌

德深禮大道高饗穆就陽斯基陟配惟肅血膺  
升氣冕裘標服誠感清玄信陳史祝祇承靈睟

載膺多福

誠夏

皇帝  
初獻

肇禋崇祀式奉

一作  
大報

尊靈因高盡

一作  
就

敬掃地

推誠六宗隨兆五緯陪營雲和發韻孤竹揚聲

一作  
清

我粢既潔我酌惟明元神是鑒百祿來成

文舞

皇帝既  
獻奏

皇矣上帝受命自天睿圖作極文教遐宣四方

監觀萬國陶甄有苗斯格無得稱焉天地之經

和樂具舉休徵咸萃要荒式序正位履端秋霜

春雨

需夏

皇帝飲福酒

禮以恭事薦以饗時載清玄酒備絜薌其廻旒  
分爵思媚軒墀惠均撤俎祥降受釐十倫以具  
百福斯滋克昌厥德永祚鴻基

武舞

御曆膺期乘乾表則成功戡亂順時經國兵暢  
五材武弘七德憬彼遐裔化行克塞三道備舉  
二儀交泰情發自中義均莫大祀敬恭肅鐘鼓

繁會萬國斯歡兆民斯賴享茲介福康哉元首  
惠我無疆天長地久

昭夏

送神

享序洽祀禮施神之駕儼將馳奔精驅長離耀  
牲煙達潔誠照騰日馭鼓電鞭辭下土升上玄  
瞻寥廓杳無際懽羣心留餘惠

### 五郊歌五首

隋書樂志曰五郊歌辭青郊奏角音赤  
郊奏徵音黃郊奏宮音白郊奏商音黑  
郊奏羽音迎送神  
登歌與國丘同

青帝歌角音

震宮初動木德惟仁龍精戒旦鳥曆司春陽光  
煦物溫風先導巖處載驚膏田已冒犧牲豐潔  
金石和聲懷柔備禮明德惟馨

赤帝歌徵音

長嬴開序炎上爲德執禮司萌持衡御國重離  
得位芒種在時含櫻薦實木槿垂蕤慶賞旣行  
高明可處順時立祭事昭福舉

黃帝歌宮音

爰稼作土順位稱坤孕金成德履艮爲尊黃本  
內色宮寶聲始萬物資生四時咸紀靈壇汎掃  
盛樂高張威儀孔備福履無疆

白帝歌商音

西成肇節盛德在秋三農稍已九穀行收金氣  
肅殺商威颶戾嚴風鼓莖繁霜隕蒂厲兵詰暴  
救法慎刑明神降嘏國步惟寧

黑帝歌羽音

玄英啟候冥陵初起虹藏於天雉化于水嚴關

重閉星迴日窮黃鐘動律廣莫生風玄尊示本  
天產惟質恩覃外區福流京室

感帝歌

隋書樂志曰祀感帝奏誠  
夏迎送神登歌與圖丘同

誠夏

帝祖垂典郊天有章以孟之春于國之陽  
繭栗惟誠陶匏斯尚人神接禮明幽交暢  
火靈降祚火曆載隆烝哉帝道赫矣皇風

雩祭歌



隋書樂志曰雩祭蜡祭朝月夕月並奏誠夏其迎送神登歌並與圜丘同

誠夏

未明啟候時載陽肅若舊典延五方嘉薦以陳  
盛樂奏氣序和平資靈祐公田旣雨私亦濡民  
殷俗富政化敷

蜡祭歌

誠夏

四方有祀八蜡酬功收藏旣畢榛葛送終使之  
必報祭之斯索三時告勞一日爲澤神祇必來

麟羽咸致惟義之盡惟仁之至年成物阜罷役  
息民皇恩已洽靈慶無垠

朝日夕月歌二首

朝日誠夏

扶木上朝暾崑山沈暮景寒來遊畧促暑至馳  
輝永時和合璧耀俗泰重輪明執圭盡昭事服  
冕罄虔誠

夕月誠夏

澄輝燭地域流耀鏡天儀層草隨弦長珠胎逐

望虧成形表蟾兔竊藥資王母西郊禮既成  
壇福惟厚

方丘歌四首

隋書樂志曰祭方丘唯此四者異餘並同圜丘

昭夏 迎神

柔功暢陰德昭陳瘞典盛玄郊篚霏清管  
皇情虔具寮肅笙頌合鼓鼗會出桂旌屯虬蓋  
敬如在肅有承神胥樂慶福膺

登歌

奠玉帛

道惟生育器乃包藏報功稱範敷薦有常六瑚  
已饋五齊流香貴誠尚質敬洽義章神祚惟永  
帝業增昌

誠夏

初獻

原載垂德崑丘主神陰壇吉禮北至良辰鑒水  
呈潔牲栗表純樽壺夕啟幣玉朝陳羣望咸秩  
精靈畢臻祚流於國祉被於人

昭夏

奠既徹獻已周竦靈駕逝遠遊洞四極匝九縣

慶方流祉恒遍埋玉氣掩牲芳晰神理顯國文

神州歌

隋書樂志曰祭神州奏社稷先農並奏誠夏其迎送神登歌並與方丘同

誠夏

四海之內一和之壤地曰神州物賴生長咸池  
既降泰圻斯饗牲牷尚黑珪玉實兩九寓載寧  
神功克廣

社稷歌四首

春祈社誠夏

厚地開靈方壇崇祀達以風露樹之松梓勾萌  
旣申芟祚伊始恭祈粢盛載膺作祉

春祈稷誠夏

粒食興教播厥有先尊神致潔報本惟虔瞻榆  
束耒望杏開田方憑戩福佇詠豐年

秋報社誠夏

北墉申禮單出表誠豐犧入薦華樂在庭原隰  
旣平泉流又清如雲已望高廩斯盈

秋報稷誠夏

民天務急農亦勤止或裴或薦惟疊惟芭涼風  
戒時歲云秋矣物成則報功施必祀

先農歌

誠夏

農祥晨晰土膏初起春原似載青壇致祀歛蹕  
長阡迴旌外壝房俎飾薦山罍沈泮親事朱絃  
躬持黛耜恭神務穡受禧降祉

先聖先師歌

誠夏

經國立訓學重教先三墳肇冊五典留篇開鑒  
理著陶鑄功宜東膠西序春誦夏弦芳塵載仰  
祀典無騫

太廟樂歌九首

迎神歌

務本興教尊神體國霜露感心享祀陳則官聯  
式序奔走在庭几筵結慕裸獻惟誠嘉樂載合  
神其降止永言保之錫以繁祉

登歌



孝熙嚴祖師象敬宗惟皇肅肅有來雍雍雕甍  
霞複繡櫺雲重觀德自感奉璋伊恭彝等盡飾  
羽綴有容升歌發藻景福來從

俎入歌

郊丘廟  
社同

祭本用初祀由功舉駿奔咸會供神有序明酌  
盈樽豐犧實俎幽金旣薦纘錯維旅享由明德  
香非稷黍載流嘉慶克固鴻緒

皇高祖太原府君神室歌

締基發祥肇源興慶廼仁廼哲克明克令庸宣

國圖善流人詠開我皇業七百同盛

皇曾祖康王神室歌

皇條俊茂帝系靈長豐功疊軌厚利重光福由  
善積代以德彰嚴恭盡禮永錫無疆

皇祖獻王神室歌

盛才必達丕基增舊涉渭同符遷邠等構弘風  
邁德義高道富神鑒孔昭王猷克懋

皇考太祖武元皇帝神室歌

深仁冥著至道潛敷皇矣太祖耀名天衢翦商

降祚奄宅隋區有命旣集誕開靈符

飲福酒歌

郊丘廟社同用

神道正直祀事有融肅雍備禮莊敬在躬羞燔  
已具奠醑將終降祥惟永受福無窮

送神歌

饗禮具利事成佇旒冕肅簪纓金奏終玉俎撤  
盡孝敬窮嚴潔人祇分哀樂半降景福憑幽贊

燕射歌辭

元會大饗歌十一首

皇夏

皇帝出入殿庭奏郊丘廟社並同

深哉皇度粹矣天儀司陞整蹕式道先馳八屯  
霧擁七萃雲披退揚進揖步矩行規勾陳乍轉  
華蓋徐移羽旗照耀珪組陸離居高念下處安  
思危照臨有度紀律無虧

肆夏

太子出入

惟熙帝載式固王猷體乾建本是曰孟侯馳道  
美漢寢門稱周德心旣廣道業惟優傳保斯導  
賢才與遊瑜玉發響畫輪停輶皇基方峻七德

恒休

食舉歌

八曲

燔黍設教禮之始五味相資火爲紀平心和德  
在甘旨牢羞旣陳鐘石俟以斯而御揚盛軌  
養身必敬禮食昭時和歲阜庶物饒鹽梅旣濟  
鼎鉉調特以膚腊加臠臠威儀濟濟懋皇朝  
饗人進羞樂侑作川潛之膾雲飛雁甘酸有宜  
芬芍藥金敦玉豆盛交錯玉鼓旣聲安以樂  
玉食惟后膳必珍芳菹旣潔重柜新是能安體

又調神荆包必至海貢陳用之有節德無垠

嘉羞入饋猶化謐沃土名滋帝臺實陽華之菜

雕陵栗鼎俎芬芳豆籩溢通幽致遠車書一

道高物備食多方山膚旣善水豢良桓蒲在位

簋業張加籩折俎爛成行恩風下濟道化光

禮以安國仁爲政具物必陳饗牢盛置果斤斧

順時令懷生熙熙皆得性于茲宴喜流嘉慶

皇道四達禮樂成臨朝日舉表時平甘芳旣饌

醕以清揚休玉卮正性情隆我帝載永明明

上壽歌

俗已乂時又良朝玉帛會衣裳基同北辰久壽  
共南山長黎元鼓腹樂未央

宴羣臣登歌

皇明馭曆仁深海縣載擇良辰式陳高宴頤頤  
卿士昂昂侯甸車旗煜爚衣纓葱蒨樂正展懸  
司官飾殿三揖讓禮九賓爲傳圓鼎臨碑方壺  
在面鹿鳴成曲嘉魚入薦筐篚相輝獻酬交徧  
飲和飽德恩風長扇

皇后房內歌

隋書樂志曰高祖龍潛時頗好音樂嘗倚琵琶作歌二章名曰地厚天高託言夫婦之儀牛弘脩皇后房內樂因取之爲房內曲命婦人并登歌上壽並用之

至順垂典正內弘風母儀萬國訓範六官求賢  
啟化進善宣功家邦載序道業斯融

大射登歌

道謐金科照時又玉條明優賢饗禮洽選德射  
儀成鑾旗鬱雲動寶軼儼天行巾車整三乏同  
裘飾五正鳴球響高殿華鐘震廣庭烏號傳



美淇衛著前名揖讓皆時傑升降盡朝英附被  
觀體定杯水覩心平豐觚旣來去燔炙復縱橫  
欣看禮樂盛喜遇黃河清

鼓吹曲辭

凱樂歌辭三首

述帝德

於穆我后睿哲欽明膺天之命載育羣生開元  
創曆邁德垂聲朝宗萬寓祗事百靈煥乎皇道  
昭哉帝則惠政滂流仁風四塞淮海未賓江湖

背德運籌必勝濯征斯克八荒霧卷四表雲寒  
雄圖盛畧邁後光前寰區已泰福祚方延長歌  
凱樂天子萬年

述諸軍用命

帝德遠覃天維宏布功高雲天聲隆韶濩惟彼  
海隅未從王度皇赫斯怒元戎啟路桓桓猛將  
赴赴英謨攻如燎髮戰似摧枯救茲塗炭克彼  
妖道塵清兩越氣靜三吳鯨鯢已夷封疆載闢  
班馬蕭蕭歸旌奕奕雲臺表郊司勲紀績業並

山河道固金石

述天下太平

阪泉軒德丹浦堯勲始實以武終乃以文嘉樂  
聖主大哉爲君出師命將廓定重氛書軌旣并  
十戈是戢弘風設教政成人立禮樂聿興衣裳  
載緝風雲自美嘉祥爰集皇皇聖政穆穆神猷  
牢籠虞夏度越姬劉日月比耀天地同休永清  
四海長帝九州

舞曲歌辭

文武舞歌二首

隋書樂志曰隋有文舞武舞各六十  
四人又依樂記象德擬功初來就位  
擗干而立思君道之難也發揚蹈厲  
威而不殘也舞亂皆坐四海咸安也  
武始而受命再成而定山東三成而  
平蜀道四成而北狄是通五成而江  
南是拓六成復綴以闡大平

文舞歌

天睠有屬后德惟明君臨萬寓昭事百靈濯以  
江漢樹之風聲罄地畢歸窮天皆至六戎仰創  
八蠻請吏烟雲獻彩龜龍表異緝和禮樂燮理

陰陽功由舞見德以歌彰兩儀同大日月齊光  
武舞歌

惟皇御寓惟帝乘乾五材並用七德兼宣平暴  
夷險拯溺救燔九域載安兆庶斯賴續地之厚  
補天之大聲隆有截化覃無外鼓鑠旣奮千戚  
仗陳功高德重政謚化淳鴻休永播久而彌新

詩

奉和冬至乾陽殿受朝應詔

恭已臨萬寓宸居御八埏作貢菁茅集來朝圭  
幣連司儀三揖盛掌禮九賓虔重欄映如壁復  
繞非煙

煬帝冬至乾陽殿受朝附

北陸玄冬盛南至晷漏長端拱朝萬國守文  
繼百王至德愍日用治道愧時康新邑建嵩  
垂雙闕臨洛陽圭景正八表道路均四方碧

空霜華淨朱庭皎日光纓珮旣濟濟鐘鼓何  
鏗鏘文戟翊高殿承賕分脩廊元首乏明哲  
股肱貴惟良舟楫行有寄庶此王化昌

牛奇章集卷之二

隋安定牛弘里仁著

明閩漳張燮紹和纂

表

請開獻書表

經籍所興由來尚矣爰畫肇於庖羲文字生於  
倉頡聖人所以弘宣教導博通古今揚於王庭  
肆於時夏故堯稱至聖猶考古道而言舜其大  
智尚觀古人之象周官外史掌三皇五帝之書



及四方之志武王問黃帝顓頊之道太公曰在  
丹書是知握符御曆有國有家者曷嘗不以詩  
書而爲教因禮樂而成功也昔周德旣衰舊經  
紊棄孔子以大聖之才開素王之業憲章祖述  
制禮刊詩正五始而脩春秋闢十翼而弘易道  
治國立身作範垂法及秦皇馭寓吞滅諸侯任  
用威力事不師古始下焚書之令行偶語之刑  
先王墳籍掃地皆盡本旣先亡從而顛覆臣以  
圖識言之經典盛衰信有徵數此則書之一厄

也漢興改秦之弊敦尚儒術建藏書之筴置校  
書之官屋壁山巖往往間出外有太常太史之  
藏內有延閣秘書之府至孝成之世亡逸尚多  
遣謁者陳農求遺書於天下詔劉向父子讎校  
篇籍漢之典文於斯爲盛及王莽之末長安兵  
起宮室圖書並從焚燼此則書之二厄也光武  
嗣興猶重經誥未及下車先求文雅於是鴻生  
鉅儒繼踵而集懷經負帙不遠斯至肅宗親臨  
講肄和帝數幸書林其蘭臺石室鴻都東觀祕

牒填委更倍於前及孝獻移都吏民擾亂圖書  
縑帛皆取爲帷囊所收而西裁七十餘乘屬西  
京大亂一時燔蕩此則書之三厄也魏文代漢  
更集經典皆藏在秘書內外三閣遣秘書郎鄭  
默刪定舊文時之論者美其朱紫有別晉氏承  
之文籍尤廣晉秘書監荀勗定魏內經更著新  
簿雖古文舊簡猶云有缺新章後錄鳩集已多  
足得恢弘正道訓範當世屬劉石憑陵京華覆  
滅朝章國典從而失墜此則書之四厄也永嘉

之後寇竊競興因河據洛跨秦帶趙論其建國  
立家雖傳名號憲章禮樂寂滅無聞劉裕平姚  
收其圖籍五經子史纔四千卷皆赤軸青紙文  
字古拙僭偽之盛莫過二秦以此而論足可明  
矣故知衣冠軌物圖書記注播遷之餘皆歸江  
左晉宋之際學藝爲多齊梁之間經史彌盛宋  
秘書丞王儉依劉氏七略撰爲七志梁人阮孝  
緒亦爲七錄摠其書數三萬餘卷及侯景渡江  
破滅梁室秘省經籍雖從兵火其文德殿內書

史宛然猶存蕭繹據有江陵遣將破平侯景收  
文德之書及公私典籍重本七萬餘卷悉送荆  
州故江表圖書因斯盡萃於繹矣及周師入郢  
繹悉焚之於外城所收十纔一二此則書之五  
厄也後魏爰自幽方遷宅伊洛日不暇給經籍  
闕如周氏創基關右戎車未息保定之始書止  
八千後加收集方盈萬卷高氏據有山東初亦  
採訪驗其本目殘缺尤多及東夏初平獲其經  
史四部重雜三萬餘卷所益舊書五千而已

御書單本合一萬五千餘卷部帙之間仍有殘  
缺比梁之舊目止有其半至於陰陽河洛之篇  
醫方圖譜之說彌復爲少臣以經書自仲尼已  
後迄于當今年踰千載數遭五厄興集之期屬  
膺聖世伏惟陛下受天明命君臨區宇功無與  
二德冠往初自華夏分離爰倫攸斁其間雖霸  
王遞起而世難未夷欲崇儒業時或未可今土  
宇邁於三王民黎盛於兩漢有人有時正在今  
日方當大弘文教納俗升平而天下圖書尚有

遺逸非所以仰協聖情流訓無窮者也臣史籍  
是司寢興懷懼昔陸賈奏漢祖云天下不可馬  
上治之故知經邦立政在於典謨矣爲國之本  
莫此攸先今祕藏見書亦足披覽但一時載籍  
須令大備不可王府所無私家乃有然士民殷  
雜求訪難知縱有知者多懷恹惜必須勒之以  
天威引之以微利若猥發明詔兼開購賞則異  
典必臻觀閣斯積重道之風超於前世不亦善  
乎伏願天鑒少垂昭察

奏

定樂奏

臣聞周有六代之樂至韶武而已秦始皇改周舞曰五行漢高帝改韶武曰文始以示不相襲也又造武德自表其功故高帝廟奏武德文始五行之舞又作昭容禮容增演其意昭容生於武德蓋猶古之韶也禮容生於文始矯秦之五行也文帝又作四時之舞故孝景帝立追述先功采武德舞作昭德舞被之管絃薦於太宗之



廟孝宣采昭德舞爲盛德舞更造新歌薦於武帝之廟據此而言遞相因襲縱有改作並宗於韶至明帝時東平獻王采文德舞爲大武之舞薦於光武之廟漢末大亂樂章淪缺魏武平荊州獲杜夔以爲軍謀祭酒使創雅樂時散騎侍郎鄧靜善詠雅歌樂師尹胡能習宗祀之曲舞師馮肅曉知先代諸舞總練研精復於古樂自夔始也文帝黃初改昭容之樂爲昭業樂武德之舞爲武頌舞爲始之舞爲大韶舞五行之舞

爲大武舞明帝初公卿奏上太祖武皇帝樂圖  
武始之舞高祖文皇帝樂曰咸熙之舞又製樂  
舞名曰章斌之舞有事於天地宗廟及臨朝太  
饗並用之晉武帝泰始二年遣傅玄等造行禮  
及上壽食舉歌詩張華表曰按漢魏所用雖詩  
章辭異興廢隨時至其韻逗曲折並繫於舊一  
皆因襲不敢有所改也九年荀勗典樂使郭夏  
宋識造王德大豫之舞改魏昭武舞曰宣武舞  
羽籥舞曰宣文舞江左之初典章堙紊賀循爲

太常卿始有登歌之樂大寧未阮孚等又增益之咸和間鳩集遺逸鄴沒胡後樂人頗復南度東晉因之以具鍾律太元間破符永固又獲樂工陽蜀等開練舊樂於是金石始備尋共設懸音調並與江左是同慕容垂破慕容永於長子盡獲苻氏舊樂垂息爲魏所敗其鍾律令李佛等將太樂細伎奔慕容德於鄴德遷都廣固子超嗣立其母先沒姚興超以太樂伎一百二十人請興贖母及宋武帝入關悉收南度永初元

年改正德舞曰前舞大武舞曰後舞文帝元嘉九年太樂令鍾宗之更調金石至十四年典書令奚縱復改定之又有凱容宣業之舞齊代因而用之蕭子顯齊書志曰宋孝建初朝議以凱容舞爲韶舞宣業舞爲武德舞據韶爲言宣業卽是古之大武非武德也故志有前舞凱容歌辭後舞凱容歌辭者矣至於梁初猶用凱容宣業之舞後改爲大壯大觀焉今人猶喚大觀爲前舞故知樂名雖隨代而改聲韻曲折理應尚

同前克荊州得梁家雅曲今平蔣州又得陳氏  
正樂史傳相承以爲合古且觀其面體用聲有  
次請脩緝之以備雅樂其後魏洛陽之曲據魏  
史云太武平赫連昌所得更無明證後周所用  
者皆是新造雜有邊裔之聲戎音亂華皆不可  
用請悉停之

高帝答詔附

制禮作樂聖人之事也功成化洽方可議之  
今宇內初平王化未洽遽有變革我則未暇

樂定奏

臣聞蕢桴土鼓由來斯尚電出地奮著自易經  
遂古帝王經邦馭物揖讓而臨天下者禮樂之  
謂也秦焚經典樂書亡缺爰至漢興始加鳩探  
祖述增廣緝成朝憲魏晉相承更加論討汾華  
之宜備於故實永嘉之後九服崩離燕石苻姚  
遞據華土此其戎乎何必伊川之上吾其左袵  
無復微管之功前言往式於斯而盡金陵建社  
朝士南奔帝則皇規粲然更備於內原隔絕三

百年於茲矣伏惟明聖膺期會昌在運今南征  
所獲梁陳樂人及晉宋旗章宛然俱至曩代所  
不服者今悉服之前朝所未得者今悉得之化  
洽功成於是乎在臣等伏奉明詔詳定雅樂傳  
訪知音旁求儒彥研校是非定其去就取爲一  
代正樂具在本司

定典禮奏

聖教陵替國章殘缺漢晉爲法隨俗因時未足  
經國庇人弘風施化且制禮作樂事歸元首江  
南王儉偏隅一臣私撰儀注多違古法就廬非  
東階之位凶門豈設重之禮兩蕭累代舉國遵  
行後魏及齊風牛本隔殊不尋究遙相師祖故  
山東之人浸以成俗西魏已降師旅弗遑賓嘉  
之禮盡未詳定今休明啟運憲章伊始請據前  
經革茲俗弊



論

十六律論

案續漢書律曆志元帝遣韋玄成問京房於樂府房對受學故小黃令焦延壽六十律相生之法以上生下皆三生二以下生上皆三生四陽下生陰陰上生陽終於中呂而十二律畢矣中呂上生執始執始下生去滅上下相生終於南事六十律畢矣十二律之變至於六十猶八卦之變至於六十四也冬至之聲以黃鍾爲宮大

簇爲商姑洗爲角林鍾爲徵南呂爲羽應鍾爲  
變宮蕤賓爲變徵此聲氣之元五音之正也故  
各統一日其餘以次運行宮日者各自爲宮而  
商徵以類從焉房又曰竹聲不可以度調故作  
准以定數准之狀如瑟長一丈而十三絃隱間  
九尺以應黃鍾之律九寸中央一絃下畫分寸  
以爲六十律清濁之節執始之類皆房自造房  
云受法於焦延壽未知延壽所承也至元和年  
待詔候鍾殷彤上言官無曉六十律以准調音

者故待詔嚴嵩具以准法教其子宣願召宣補  
學官主調樂器太史丞弘試宣十二律其二申  
其四不申其六不知何律宣遂罷自此律家莫  
知爲准施絃嘉平年東觀召典律者太子舍人  
張光問准意光等不知歸閱舊藏乃得其器形  
制如房書猶不能定其絃緩急故史官能辨清  
濁者遂絕其可以相傳者唯太權常數及候氣  
而已據此而論經房之法漢世已不能行沈約  
宋志曰詳案古典及今音家六十律無施於樂

禮云十二管還相爲宮不言六十卦禪書云大帝使素女鼓五十絃瑟而悲破爲二十五絃假令六十律爲樂得成亦所不用取大樂必易大體必簡之意也

牛奇章集卷之三

隋安定牛弘里仁著

明閩漳張燮紹和纂

議

明堂議

竊謂明堂者所以通神靈感天地出教化崇有德孝經曰宗祀文王於明堂以配上帝祭義云祀于明堂教諸侯孝也黃帝曰合宮堯曰五府舜曰總章布政興治由來尚矣周官考工記曰

夏后氏世室堂脩二十七廣四脩一鄭玄注云脩  
十四步其廣益以四分脩之一則堂廣十七步  
半也殷人重屋堂脩七尋四阿重屋鄭云其脩  
七尋廣九尋也周人明堂度九尺之筵南北七  
筵五室凡室二筵鄭云此三者或舉宗廟或舉  
王寢所舉明堂互言之明其同制也馬融王肅  
于寶所注與鄭亦異今不具出漢司徒馬宮議  
云夏后氏世室室顯於堂故命以室殷人重屋  
屋顯於堂故命以屋周人明堂堂大於夏室故

命以堂夏后氏益其堂之廣百四十四尺周公  
明堂以爲兩序間大夏后氏七十二尺若據鄭  
玄之說則夏室大於周堂如依馬官之言則周  
堂大於夏室後王轉文周大爲是但官之所言  
未詳其義此皆去聖久遠禮文殘缺先儒解說  
家異人殊鄭注玉藻亦云宗廟路寢與明堂同  
制王制同寢不踰廟明大小是同今依鄭玄注  
每室及堂止有一丈八尺四壁之外四尺有餘  
若以室廟論之祫享之時周人旅酬六尸并后

穆爲七先公昭穆二尸先王昭穆二尸合十一尸三十六王及君北面行事於二丈之堂愚不及此若以正寢論之便須朝寢據燕禮諸侯宴則賓及卿大夫脫屨升坐是知天子宴則三公九卿並須升堂燕義又云席小卿次上卿言皆侍席止於二筵之間豈得行禮若以明堂論之總享之時五帝各於其室設青帝之位須於太室之內少北西面太昊從食坐於其西近南北面祖宗配享者又於青帝之南稍退西面丈八



之室神位有三加以簠簋籩豆牛羊之俎四海  
九州美物咸設復須席工升歌出罇反玷揖讓  
升降亦以隘矣據茲而說近是不然案劉向別  
錄及馬宮蔡邕等所見當時有古文明堂禮王  
居明堂禮明堂圖明堂大圖明堂陰陽太山通  
義魏文侯孝經傳等並說古明堂之事其書皆  
亡莫得而一今明堂月令者鄭玄云是呂不韋  
著春秋十二紀之首章禮家鈔合爲記蔡邕王  
肅云周公所作周書內有月令第五十三卽此

也各有證明文多不載束皙以爲夏時之書劉  
瓛云不韋鳩集儒者尋于聖王月令之事而記  
之不韋安能獨爲此記今案不得全稱周書亦  
未可卽爲秦典其內雜有虞夏殷周之法皆聖  
王仁恕之政也蔡邕具爲章句又論之曰明堂  
者所以宗祀其祖以配上帝也夏后氏曰世室  
殷人曰重屋周人曰明堂東曰青陽南曰明堂  
西曰總章北曰玄堂內曰太室聖人南面而聽  
向明而治人君之位莫不正焉故雖有五名而

主以明堂也制度之數各有所依堂方一百四十四尺《之策也屋圓楣徑二百一十六尺乾之策也太廟明堂方六丈通天屋徑九尺陰陽九六之變且圓方蓋覆九六之道也八闔以象卦九室以象州十二宮以應日辰三十六戶七十二牖以四戶八牖乘九宮之數也戶皆外設而不閉示天下以不藏也通天屋高八十一尺黃鍾九九之實也二十八柱布四方四方七宿之象也堂高三尺以應三統四向五色各象其

行水濶二十四丈象二十四氣於外象四海王者之大禮也觀其模範天地則象陰陽必據古文義不虛出今若直取考工不叅月令青陽摠章之號不得而稱九月享帝之禮不得而用漢代二京所建與此說悉同建安之後海內大亂京邑焚燒憲章泯絕魏氏三方未平無聞興造晉則侍中裴頠議曰尊祖配天其義明著而廟宇之制理據未分宜可直爲一殿以崇嚴父之祀其餘雜碎一皆除之宋齊已還咸率茲禮此

乃世乏通儒時無思術前王盛事於是不行後  
魏代都所造出自李冲三三相重合爲九室雖  
不覆基房間通街穿鑿處多迄無可取及遷都  
洛陽更加營構五鬼紛競遂至不成宗配之事  
於焉靡託今皇猷遐闡化覃海外方建大禮垂  
之無窮弘等不以庸虛謬當議縣今檢明堂必  
須五室者何尚書帝命驗曰帝者承天立五府  
赤曰文祖黃曰神升白曰顯紀黑曰玄矩蒼曰  
靈府鄭玄注曰五府與周之明堂同矣且三代

相沿多有損益至於五室確然不變夫室以祭  
天天實有五若立九室四無所用布政視朔自  
依其辰鄭司農云十二月分在青陽等左右之  
位不云居室鄭玄亦言每月於其時之堂而聽  
政焉禮圖 皆在堂偏是以須爲五室明堂  
必須上圓下方者何孝經援神契曰明堂者上  
圓下方八窗四達何 之宮禮記盛德篇曰明  
堂四戶八牖上圓下方五經異義稱講學大夫  
淳于登亦云上圓下方鄭玄同之是以須爲圓

方明堂必須重屋者何案考工記夏言九階四旁兩夾窻門堂三之二室三之一殷周不言者明一同夏制殷言四何重屋周乘其後不言屋制亦盡同可知也其殷人重屋之下本無五室之文鄭注云五室者亦據夏以知之明周不云重屋因殷則有灼然可見禮記明堂位曰太廟天子明堂言魯爲周公之故得用天子禮樂魯之太廟與圓下明堂同又曰複廟重簷刮楹達嚮天子之廟飾鄭注複廟重屋也據廟旣重屋

明堂亦不疑矣春秋文公十三年太室屋壞五行志曰前堂曰太廟中央曰太室屋其上重者也服虔亦云太室太廟太室之上屋也周書作洛篇曰尚三太廟宗宮路寢明堂咸有四阿反玷重亢重廊孔晁注曰重亢累棟重廊累屋也依黃圖所載漢之宗廟皆爲重屋此去古猶近遺法尚在是以須爲重屋明堂必須爲辟廡者何禮記盛德篇云明堂者明諸侯尊卑也外水曰辟廡明堂陰陽錄曰明堂之制周圍行水左



旋以象天內有太室以象紫宮此明堂有水之  
明文也然馬宮王肅以爲明堂辟廱太學同處  
蔡邕盧植亦以爲明堂靈臺辟廱太學同實異  
名邕云明堂者取其宗祀之清貌則謂之清廟  
取其正室則曰太室取其堂則曰明堂取其四  
門之學則曰太學取其周水圜如壁則曰璧廱  
其實一也其言別者五經通義曰靈臺以望氣  
明堂以布政辟廱以養老教學三者不同袁準  
鄭玄亦以爲別歷代所疑豈能輒定今據郊祀

志云欲制明堂未曉其制濟南人公玉帶上黃  
帝時明堂圖一殿無壁蓋之以茅水圜宮垣天  
子從之以此而言其來則久漢中元二年起明  
堂辟廱靈臺於洛陽並別處然明堂亦有壁水  
李尤明堂銘曰流水洋洋是也以此須有辟廱  
夫帝王作事必師古昔今造明堂須以禮經爲  
本形制依於周法度數取於月令遺闕之處叅  
以餘書庶使該詳沿革之理其五室九階上圖  
下方四阿重屋四旁兩門依考工記孝經說堂

方一百四十四尺屋圓楣徑二百一十六尺太  
室方六丈通天屋徑九丈八闕二十八柱堂高  
三尺四向五色依周書月令論殿垣方在內水  
周如外水內徑三百步依太山盛惠記觀禮經  
仰觀俯察皆有則象足以盡誠上帝祇配祖宗  
弘風布教作範於後矣弘等學不稽古輒申所  
見可否之宜伏聽裁擇

樂議

謹案禮五聲六律十二管還相爲宮周禮奏黃鍾皆大呂奏太簇歌應鍾皆是旋相爲宮之義蔡邕明堂月令章句曰孟春月則大簇爲宮姑洗爲商蕤賓爲角南呂爲徵應鍾爲羽大呂爲變宮夷則爲變徵他月倣此故先王之作律呂也所以辯天地四方陰陽之聲楊子雲曰聲生於律律生於辰故律呂配五行通八風歷十二辰行十二月循環轉運義無停止譬如立春木

王火相立夏火王土相季夏餘分土王金相立  
秋金王水相立冬水王木相還相爲宮者謂當  
其王月名之爲宮今若十一月不以黃鍾爲宮  
十二月不以大簇爲宮便是春木不王夏土不  
相豈不陰陽失度天地不通哉劉歆鍾律書云  
春宮秋律百卉必彫秋宮春律萬物必榮夏宮  
冬律雨雹必降冬宮夏律雷乃發聲以斯而論  
誠爲不易且律十二今直爲黃鍾一均唯用七  
律以外五律竟復何施恐失聖人制作本意故

須依禮作還相爲官之法

詳定樂議

後周之時以四聲降神雖采周禮而年代深遠其法久絕不可依用謹案司樂凡樂圓鍾爲宮黃鍾爲角太簇爲徵姑洗爲羽舞雲門以祭天函鍾爲宮太簇爲角姑洗爲徵南宮爲羽舞咸池以祭地黃鍾爲宮大呂爲角太簇爲徵圓鍾爲羽舞韶以祀宗廟馬融曰圓鍾應鍾也賈逵鄭玄曰圓鍾夾鍾也鄭玄又云此樂無商聲祭尚柔剛故不用也于寶云不言商商爲臣王者

自謂故置其實而去其名若曰有天地人物無德以主之謙以自牧也先儒解釋旣莫知適從然此四聲非直無商又律管垂次以其爲樂無克諧之理今古事異不可得而行也按東觀書馬防傳太子丞鮑鄴寺上作樂事下防防奏言建初二年七月鄴上言天子食飲必順於四時五味而有食舉之樂所以順天地養神明求福應也今官雅樂獨有黃鍾而食舉樂但有太簇皆不應月律恐傷氣類可作十二月均各應其



月氣公卿朝會得聞月律乃能感天和氣宜應  
詔下太常評焉太常上言作樂器直錢百四十  
六萬奏寢今明詔復下臣防以爲可須上天之  
明時因歲首之嘉月發大簇之律奏雅頌之音  
以迎和氣其條貫甚具遂獨施行起於十月爲  
迎氣之樂矣又順帝紀云陽嘉二年冬十月庚  
午以春秋爲辟雍隸大學隨月律十月作應鍾  
三月作姑洗元和以來音戾不調修復黃鍾作  
樂器如舊典據此而言漢樂官懸有黃鍾均食

舉太簇均止有二均不旋相爲宮亦以明矣計  
從元和至陽嘉二年纔五十歲用而復止驗黃  
帝聽鳳以制律呂尚書曰予欲聞六律五聲周  
禮有分樂而祭此聖人制作以合天地陰陽之  
和自然之理乃云音戾不調斯言誣之甚也今  
梁陳雅曲並用宮聲按禮五聲十二律還相爲  
宮盧植云十二月三管流轉用事常用事者爲  
宮宮君也鄭玄曰五聲宮商角徵羽其陽管爲  
律陰管爲呂布十二辰更相爲宮始自黃鍾終

於南呂凡六十也皇侃疏還相爲宮者十一月以黃鍾爲宮十二月以大呂爲宮正月以太簇爲宮餘月倣此凡十二管各備五聲合六十聲五聲成一調故十二調此卽釋鄭義之明文無用商角徵羽爲別調之法矣樂稽耀嘉曰東方春其聲角樂當宮於夾鍾餘方各以其中律爲宮若有商角之理不得云宮餘夾鍾也又云五音非宮不調五味非甘不和又動聲儀宮唱而商和是謂善本太平之樂也周禮奏黃鍾歌大

呂以祀天神鄭玄以黃鍾之鍾大呂之聲爲均  
均調也故崔靈恩云六樂十二調亦不獨論商  
角徵羽也又云凡六樂者皆文之以五聲猶之  
以八音故知每曲皆須五聲八音錯綜而能成  
也禦寇子云師文鼓琴命官而總四聲則慶雲  
浮景風翔唯韓詩云聞其宮聲使人溫厚而寬  
大聞其商聲使人方廉而好義及古有清角清  
徵之流此則當聲爲曲今以五引爲五聲迎氣  
所用者是也餘曲悉用宮聲不勞商角徵羽備

以得知荀勗論三調爲均首者得正聲之名明  
知雅樂悉在官調已外徵羽角自爲謠俗之音  
耳且西涼龜茲雜伎等曲數旣多故得隸於衆  
調調各別曲至如雅樂少須以宮爲本歷十二  
均而作不可分配餘調更成雜亂也

又樂議

案周官云大司樂掌成均之法鄭衆注云均調也樂師主調其音三禮義宗稱周官奏黃鍾者用黃鍾爲調歌大呂者用大呂爲調奏者謂堂下四懸歌者謂堂上所歌但一祭之間皆用二調是知據官稱調其義一也明六律六呂迭相爲宮各自爲調今見行之樂用黃鍾之宮乃以林鍾爲調與古典有違晉內書監荀勗依典記以五聲十二律還相爲宮之法制十二笛黃鍾

之笛正聲應黃鍾下徵應林鍾以姑洗爲清角  
大呂之笛正聲應大呂下徵應夷則以外諸均  
例皆如是然今所用林鍾是姑下徵之調不取  
其正先用其下於理未通故須改之

同律度量議

竊惟權衡度量經邦懋軌誠須詳求故實考校得衷謹尋今之鐵尺是太祖遣尚書故蘇綽所造當時檢勘用爲前周之尺驗其長短與宋尺符同卽以調鍾律并用均田度地今以上黨羊頭山黍依漢書律曆志度之若以大者稠累依數滿尺實於黃鍾之律須撼乃容若以中者累尺雖復小稀實於黃鍾之律不動而滿計此二事之殊良由消息未善其於鐵尺終有一會且



上黨之黍有異他鄉其色至烏其形圓重用之  
爲量定不徒然正以時有水旱之差地有肥瘠  
之異取黍大小未必得中案許慎解秬黍體大  
本異於常疑今之大者正是其中累百滿尺卽  
是會古實籥之外纔剩十餘此恐圍徑或差造  
律未妙就如撼動取滿論理亦通今勘周漢古  
錢大小有合宋氏渾儀尺度無舛又依淮南累  
粟十二成寸明先王制法索隱鈎深以律計分  
義無差異漢書食貨志云黃金方寸其重二兩

今鑄金校驗鐵尺爲近依文據理符會處多且  
平齊之始已用宣布今因而爲定彌合時空至  
於玉尺累黍以廣爲長累既有剩實復不滿尋  
訪古今恐不可用其晉梁尺量過爲短小以黍  
實管彌復不容據律調聲必致高急且八音克  
諧明王盛範同律度量哲后通規臣等詳校前  
經斟酌時事謂用鐵尺於理爲便

附錄

牛弘傳

唐魏徵

牛弘字里仁安定鵜鶘人也本姓獫狁祖熾郡中正父允魏侍中工部尚書臨涇公賜姓爲牛氏弘初在襁褓有相者見之謂其父曰此兒當貴善愛養之及長鬚貌甚偉性寬裕好學博聞在周起家中外府記室內史上士俄轉納言上士專掌文翰甚有美稱加威烈將軍員外散騎侍郎修起居注其後襲封臨涇公宣政元年轉

內史下大夫進位使持節大將軍儀同三司開  
皇初遷授散騎常侍秘書監弘以典籍遺逸上  
表請開獻書之路。上納之。於是下詔獻書一卷  
賚縑一匹。一二年間篇籍稍備。進爵奇章郡公。  
邑千五百戶。三年拜禮部尚書。勅修撰五禮  
勒成百卷。行於當世。弘請依古制。修立明堂。  
上以時事草創。未遑制作。竟寢不行。六年除太常  
卿。九年詔改定雅樂。又作樂府歌詞。撰定圜丘  
五帝凱樂。并議樂事。弘上議。須依禮作。還相爲

官之法上曰不須作旋相爲官且作黃鍾一均也弘又論六十律不可行上甚善其議詔弘與姚察許善心何妥虞世基等正定新樂事在育律志是後議置明堂詔弘條上故事議其得失事在禮志上甚敬重之時楊素恃才矜貴輕侮朝臣唯見弘未嘗不改容自肅素將擊突厥詣太常與弘言別弘送素至中門而止素謂弘曰大將出征故來叙別何相送之近也弘遂揖而退素笑曰奇章公可謂其智可及其愚不可及

也亦不以屑懷尋授大將軍拜吏部尚書時高祖又令弘與楊素蘇威薛道衡許善心虞世基崔子發等并召諸儒論新禮降殺輕重弘所立議衆咸推服之仁壽二年獻皇后崩王公已下不能定其儀注楊素謂弘曰公舊學時賢所仰今日之事決在於公弘了不辭讓斯須之間儀注悉備皆有故實素歎曰衣冠禮樂盡在此矣非吾所及也弘以三年之喪祥禫具有降殺斟酌十一月而練者無所象法以聞於高祖高祖

納焉下詔除朞練之禮自弘始也弘在吏部其  
選舉先德行而後文才務在審慎雖致停緩所  
有進用並多稱職吏部侍郎高孝基鑒賞機悟  
清慎絕倫然爽俊有餘迹似輕薄時宰多以此  
疑之惟弘深識其真推心委任隋之選舉於斯  
爲最時論彌服弘識度之遠煬帝之在東宮也  
數有詩書遺弘弘亦有答及嗣位之後嘗賜弘  
詩曰晉家山吏部魏世盧尚書莫言先哲異奇  
才並佐余學行敦時俗道素乃冲虛納言雲閣

上禮儀皇運初彝倫欣有叙垂拱事端居其同  
被賜詩者至於文詞贊揚無如弘美大業二年  
進位上大將軍三年改爲右光祿大夫從拜恒  
岳壇場珪幣墀時牲牢並弘所定還下太行煬  
帝嘗引入內帳對皇后賜以同席飲食其禮遇  
親重如此弘謂其諸子曰吾受非常之遇荷恩  
深重汝等子孫宜以誠敬自立以答恩遇之衆  
也六年從幸江都其年十一月卒於江都郡時  
年六十六帝傷惜之贈贈甚厚歸葬安定贈開



府儀同三司光祿大夫文安侯謚曰憲弘榮寵  
當世而車服卑儉事上盡禮待下以仁訥於言  
而敏於行上嘗令其宣勅弘至階下不能言退  
還拜謝云並忘之上曰傳語小辯故非宰臣任  
也愈稱其質直大業之世委遇彌隆性寬厚篤  
志於學雖職務繁雜書不釋手隋室舊臣始終  
信任悔吝不及唯弘一人而已有弟曰彌好酒  
而酗嘗因醉射殺弘駕車牛弘來還宅其妻迎  
謂之曰叔射殺牛矣弘聞之亦無所恠問直答

云作脯坐定其妻又曰叔忽射殺牛大是異事  
弘曰已知之矣顏色自若讀書不輟其寬和如  
此有文集十三卷行於世

史臣曰牛弘篤好墳籍學優而仕有淡雅之風  
懷曠遠之度採百王之損益成一代之典章漢  
之叔孫不能尚也綢繆省闋三十餘年夷險不  
渝始終無際雖開物成務非其所長然徵之不  
清混之不濁可謂大雅君子矣

奏記牛尚書

隋王孝籍

竊以毒螫瘠膚則申旦不寐饑寒切體亦卒歲  
無聊何則痛苦難以安貧窮易爲感況懷抱之  
內冰火鑠脂膏腠理之間風霜侵骨髓安可錯  
舌緘唇吞聲飲氣惡呻吟之響忍酸辛之酷哉  
伏惟明尚書公動哀矜之色開寬裕之懷咳唾  
足以活涸鱗吹噓可用蜚窮羽芬椒蘭之氣暖  
布帛之詞許小人之請聞大君之聽雖復山川  
綿遠鬼神在茲信而有徵言無不履猶恐拯溺

遲於援手救跌緩於扶足待越人之舟楫求魯  
匠之雲梯則必懸於喬樹之枝沒於深泉之底  
夫以一介貧人七年直省課役不免慶賞不霑  
賣貢禹之田供釋之之費有弱子之累乏強兄  
之產加以慈母在堂充陰遲暮寒暑違闕關山  
超遠齟齬爲期前途逾邈倚問之望朝夕傾對  
謝相如之病無官可以免發梅福之狂非仙所  
能避愁疾甚乎羈鬼人生異夫金石營魂且散  
恐箠予無徵齋恨入冥則虛緣恩顧此乃王稽

所以致言應侯爲之不樂也潛鬚髮之內居肩  
隄之間子野未嘗聞雖朱所不見久淪東觀留  
滯南史終無薦引永同理殯三世不移雖田叔  
寔十年不調寔乏知己夫不世出者聖明之君  
也不萬一者誠賢之臣也以夫不世出而逢不  
萬一小人所以爲明尚書幸也坐人物之源運  
銓衡之柄反被孤白不好緇衣此小人爲明尚  
書不取也昔荆玉未剖荆卞和之足百里未用  
碎禽息之首居得言之地有能用之資惜耳目

之明無手足之感憚而不爲孰知其解夫官或  
不稱其能士或未申其屈一夫竊議語流天下  
勞不見圖安能無望儻病未及歿狂還克念汗  
窮愁之簡屬離憂之詞託志於前修通心於來  
哲使千載之下哀其不遇追咎執事有玷清塵  
則不肖之軀歿生爲累小人之罪方且未刊願  
少加矜愍留心無忽

傷牛尚書

隋劉 斌

名臣不世出百工之所求況乃非常器遭逢興  
運秋符彩照千里銓衡綜九流經綸資博物樽  
俎寄皇猷韶濩傾復理典禮紊還脩雖貞棟梁  
任兼好藝文游佇聞和鼎實行當奉介丘高衢  
翻稅駕閱水遽遷舟傳呼更何日曳履聞無由  
歸魂藐脩路征棹艤邗溝林薄長風慘江上寒  
雲愁夜臺終不曙遺芳徒自留

遺事

三年正月朔旦大陳文物時突厥染干朝見慕之率羣臣固請衣冠帝大悅謂牛弘等曰昔漢制初成方知天子之貴今衣冠大備足致單于解辭此卿等功也

弘修皇后房內之樂據毛萇等故事皆有鍾聲而王肅之意乃言不可又陳統云婦人無外事而陰教尚柔柔以靜爲體不宜用鍾弘採肅統以取正焉



高祖遣毛爽等依古於密屋內以木爲案十有二具每取律呂之管隨十二辰位置案上以土埋之上平於地中實葭莩之灰以輕緹素覆律口每月氣至與律宐符則灰飛衝素散出于外而氣應有早晚灰飛有多少或初八月其氣卽應或至中下旬間氣始應者或灰飛出三五夜而盡或終一月纔飛少許者高祖以問牛弘弘曰灰飛半出爲和氣吹灰全爲猛氣吹灰不能出爲衰氣和氣應者其政平猛氣者其臣縱衰

氣不其臣暴高祖駮之曰臣縱君暴政不平非  
月別而有異也今十二月律於一歲內應並不  
同安得暴君縱臣若斯之甚弘不能對

牛弘爲吏部尙書選人馬儼形貌最陋側臥食  
果予弘嘲之曰嘗聞扶風馬謂言天上下今見  
扶風馬得鱸亦不假儼應聲曰嘗聞隴西牛千  
石不用鞫今見隴西牛臥地打草頭弘驚起遂

與官

朝野  
僉載